



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 3

**Wagner tekolakbai sepai tasen anisemba metetdaksüogo**

**Japan Ato kilonser Kishida-i India semdangtsü**



VOL. XX NO. 149 (ADOK 149) DIMAPUR AMUNGNÜ (SUNDAY)

METSÜREMI (MARCH) 12, 2023

₹ 5.00

## Manipur sorkari Kuki telungpur den SoO agiener

**Imphal, March 11, 2023 (Agencies):** Manipur sorkari Hokolbar aonung India sorkar, Manipur sorkar aser Kuki telungpur telok ana tsüingda Suspension of Operation (SoO) agreement nung madentsü lemtetogo.

Kuki National Army (KNA) aser Zomi Revolutionary Army (ZRA) den SoO tenangzüktep agia liasü.

Reserve forests, protected forests, wildlife sanctuaries amala lisopur ali atsünga agiba anema lungkak aitdang Kuki Inpi aser KSO dena telok aikati tashiyim agi lungkak aitba sentong agiba sülen Chief Minister N Biren Singh-i anir cabinet senden amendang iba lemtet agi.

Ken o kar atema lokti sentong ayonga lungkak aitbaji ozüngi memelar, ta Manipur cabinet-isa metetdaksü.

Manipur state sorkari forest resources kümzüka ayuba mapa aser poppy lu ayimba samatsütsü mapa inyakba nung tetsükdaksü maludaksütsü ta CM Biren Singh-i ashi.

KNO kübok telok 17 aser UPF kübok telok 8 nungi züngsemtemi sorkari lemozüksüba designated camps nung alir.

Kuki telungpurtem den SoO ya 2008 küm sign sütep aser mapang shia atsülanga arur.

Kuki telungurtemi Manipur kübok Kuki state balaka tentetsü akhanger aser tawa tu parnoki Kuki territorial council meshi aser yimtenren olemtep tenzüka liasü.

Manipur sorkari SoO agreement nung madenba atema Kuki nunger kanga shisabulur aser parnok ola mangashitsü tsübur.

State sorkari Kuki nunger temetentem kümzüka ayutsü aser maneni Kuki nunger tebilemstü atema inyaksü ta shiogo.

## Meghalaya CM-i Centre dang CUET atema shidi zilü

**Shillong, March 11, 2023 (Agencies):** Meghalaya Chief Minister Conrad Sangma-i Union Education Minister Dharmendra Pradhan dang tan academic session atema Meghalaya nung kaketshirtem asoshi Common University Entrance Test (CUET) magitsü shidi ka züluogo.

Tawa assembly election ajanga state board examination menur agitsüsa aküm aser iba ajanga kaketshirtemi CUET tatidangtem atema tayongzüka

jenti ajurua lir, ta Conrad-i shidi nung shia lir.

State sorkari state university ka lapoktsü mapa inyaker aser iba atema Meghalaya Governor nungi yakta temelaba angutsü. Meghalaya nung college teimba ka North Eastern Hill University (NEHU) nung züngsema lir anungji Meghalaya nung CUET magitsü mepishir, paisa ashi.

Yaküm-a chief minister Conrad-i mepishiba sülen Centre sorkari Meghalaya kaketshirtem CUET kübok medendaksü.

## Assam-i an aser ak bener aruba noktanger

**Guwahati, March 11, 2023 (Agencies):** India kübok state kar nung Avian Influenza aser African Swine Fever wara adokba atema Assam sorkari tanga state tem nungi an aser ak bener aruba noktanger.

"Assam aser tanga North East state tem nung Avian Influenza aser African Swine Fever menatepa moudaksütsü atema iba lemtet agiogo" ta Assam Animal Husbandry and Veterinary

Minister Atul Bora-i metetdaksü. "Linük kübok state kar nung AI aser ASF wara adokba nung ajemdaker Assam anüolen tsütsülen nungi an aser ak ken atema (temporary ban) bener arutsü memelar" ta Atul Bora-i ashi.

Taküm January ita Madhya Pradesh kübok Damoh district ketdangsurtemi African Swine Flu tsübuwa ak 700 tema tepsetogo.

## Arunachal sorkar ketdangsur 42 mapa nungi anentsütsü

**Itanagar, March 11, 2023 (Agencies):** Arunachal Pradesh State Public Service Commission ajanga tatidang balala agia arudang tim masüba mapa nung shilem agir sorkar ketdangsur 42 mapa nungi anentsütsü ta Chief Minister Pema Khandu-i ashi.

"2017 nungi Arunachal Pradesh Public Service Commission-i tatidang 11 agiogo aser iba nung sorkar ketdangsur 42 dena nisung 54-i tim masüba inyakba atema pua lir" ta

Assembly nung budget olemtepdang CM Khandu-i ashi.

APPSC paper leak ken o ya meimchir anema lir aser state police indang Special Investigating Cell (SIC) ajanga sorkari bushisüngdang aru aser Central Bureau of Investigation (CBI) nem agütsüogo, ta paisa ashi.

December 9, 2022 nung CBI-i nisung 8 anema chargesheet ka benok aser ano January 30, 2023 nung nisung ka anema chargesheet benokogo.

## CUET kübok Nagaland college tem medendaksütsü mepishir: ANCSU



**Dimapur, March 11, 2023 (TYO):** All Nagaland College Students' Union (ANCSU)-i Nagaland Chief Secretary dang Common University Entrance Test (CUET) kübok Nagaland nung college tem medendaksütsü atema mepishia shidi ka züluogo.

CUET ajanga kaketshirtem aser board balala tsüingda meputep aliba agientsü, tatidang

aiben agiba khuret pongpatsü aser kaketshir asadanga liromedemtsü. CUET ajanga kaketshirtemi maongka shitak ngua zünga otetsü aser university tajungtiba nung admission sütettsü. Ajisüaka Nagaland nung online mode CBT ajanga CUET mapa inyaksüba nung timtem aika lir, ta ANCSU-i ashi.

Nagaland kübok tesem aika nung digital connectivity shitak

mali, tesem kar nung internet mangur aser kar nung electricity shitak maliba ajanga network majung, ta parnokisa ashi.

National Testing Agency-i Nagaland kübok district 10 nung CUET tatidang agitsü atema Common Service Centres 523 jangjateta lir saka CSC/Facilitation centres aika nung mapa meinyakteter aser ano district kar nungbo CSC/Facilitation centre mali, ta ANCSU-isa Nagaland Chief Secretary dang ashi.

Iba jagi University Grants Commission aser Ministry of Education dang Nagaland nung affiliated aser autonomous college tem CUET kübok medendaksütsü aser academic year 2023-2024 atema kaketshirtemi parnok affiliated colleges nung admission asütsü temelaba agüjang ta shidaksünür, ta ANCSU-isa metetdaksüogo.

## South Asia nung Cancer facility tulutiba Assam nung lapoktsü

**Guwahati, March 11, 2023 (Agencies):** South Asia nung Cancer research facility tulutiba Assam nung lapoktsü. Iba center ya Kamrup district kübok Amingaon nung yanglutsü.

Iba center dang South Asia Cancer Research Centre ta ajatsü.

March 10, 2023 nü Department of Medical Education and Research-i Guwahati nung workshop ka ayonga agi. Iba sentong nung linük nung mongintem adenshir

shisa lemsatapa liasü.

World-renowned expert aser Memorial Sloan Kettering den külemi inyaksema arur Dr D Nori-i iba sentong nung shilem agi.

US nung amenoka aliba consulting organization M/S Iqvia Lnc nem project report aser roadmap renemtsü mapa lemozüksüogo. AIIMS, SCI, BCCI, IIT Guwahati, GMCH aser ACCF hospitals nungi scientists aser faculty jaoka shisa lemsatap.

"Tanur dak sendakba cancer

anepalutsü atema paediatric oncology hospital ka adentsü aser iba ya cancer research centers tajungtiba rongnung ka asütsü. Iba mapatong nungsa paediatric cardiology wing ka adentsü" ta Medical Education & Research Department, Assam commissioner & secretary Dr Siddharth Singh-i ashi.

Assam nung cancer treatment centers 17 aser research facility ajanga alima nung mongintem atsür arutsü ta Singh-isa ashi.

## MPLADS funds nung SC/ST clause melenshiogo

**New Delhi, March 11, 2023 (Agencies):** Members of Parliament Local Area Development Scheme (MPLADS) amshiyim nung temelenshi ka süogo aser ibaji Scheduled Caste aser Scheduled Tribe tesemtem nung kechi südir süaka senotsü amshitsü ta aliba nungi amshi junger ta melenba lir.

2016 nungi iba scheme meyipa repringshia aru aser April 1, 2023 nungi inyakyim tasenba mapa kuma tenzütsü.

"Scheduled Castes aser Scheduled Tribes aliba tesemtem nung infrastructure development atema temulung balaka agütsütsü kanga nungdaker. MP temi küm shia MPLADS fund nungi 15% bosa Scheduled Caste alidak aser 7.5% bosa Scheduled Tribes alidak endoktsüla" ta 2016 guidelines nung shia lir.

Tetezü MPkati kumpungu nung

Rs 25 crore amshitsü lemozükra küm shia SC tesemtem nung Rs 3.75 crore aser ST tesemtem nung Rs 1.87 crore endoktsüla.

Ajisüaka, tang guidelines tasen yanglushiba nung "Scheduled Castes aser Scheduled Tribes aliba tesemtem nung infrastructure renloktsü atema temulung agütsütsüla, anungji Members of Parliament-i küm shia MPLADS entitlement nungi 15% Scheduled Caste alidak aser 7.5% Scheduled Tribe alidak amshitsü shidanger" ta melena lir.

"MP temi MPLADS kübok küm shia Rs 5 crore lemozükba nungi SC/ST tesemtem nung kechi südir süaka terenlok mapa inyaksü lateta liasü saka guidelines tasenba nungbo iba ya 'advisory' clause ka ama dang kümogo aser SCs o ST tesemtem nung terenlok mapa

nung tetsükdaksü angutsü" ta CPI(M) Rajya Sabha MP John Brittas-i ashi.

MPLADS funds ajanga loktiliba nung teküpok jenjang nung alir tesemtem renlokaksü atema mapa tulu inyaka arur. Iba ajanga tzü tajemtsü agütsür, gari lenmangtem yanglur, school tem nung metsümeshidak yanglur saka tang melenshiba ajanga MPLADS nükjidong matongtsü, ta Brittas-isa ashi.

Ajisüaka, BJP lennirtem aser BJP SC Morcha lennirtemibo iba temelenshi atema kecha mashi.

BJP-i 2014 nungi SC aser ST nübortem mesüzüka anidena arur. Tawa Tripura, Meghalaya aser Nagaland elections sülen Prime Minister Narendra Modi-i lisopurtem dang BJP ya Khristantem anemba party ta aitsüaka BJP dak tamang akaba atema pelar ta metetdakja liasü.

## Rev Dr Vihienuo-i kensep tasen ka sayatsüogo



**Kohima, Metsüremi/March 11 (TYO):** Asangur ti agi kümtetba kentenba telok Maleate-i, "Telling the world about His love" ta nüngja agütsür kensep ka sayaogo.

Iba kensep nung ken ter lir; ken pongu English nung aser ken pongu Tenyidie nung lir. Iba kensep ya Executive Director of Angami Baptist Churches Council Rev Dr Rachülie Vihienuo-i March 11 nikongtsütsü De Oriental Grand nung sentong ka agiba mapang sayaja liasü.

Kentenertem ya Kekhrieyie Belho, Khrietsonyü Whuorie & Viketouco Belho: Soprano, Vilakienyü Liezietsu: Alto,

Kevidzezo Suokhrie & Mharavizo Kesiezie: Tenor aser Ruokuokhrietuo Mepfhüo & Petsüsetuo Liezietsu: Bass nung lir.

Sentong nung o jembiba mapang Rev Dr Vihienuo-i, gospel music ajungketba aser Arogo züngsemtem sempet ajungketba nung Arogoi shilem tulu ka agitsü anüngdaka lir, ta ashi.

Pai Arogo tem dang iba ya maongka ka ama agitsü aser kentenertem nem teyari agütsütsü ajungshi ajita asünungdang Christian artists tem khen atema dang masü saka iba ajanga career yanglutettsü, ta ashi.

Nagaland nung Christian

Music Awards agi anünga lir ta shia Rev Dr Vihienuo-i, Christian music quality aser standards jangjatsü atema iba amala sabang ka amenoktsü nüngdakba lemsatapa liasü.

Maneni pai, tangari mejemba ken atenba den külemi pei mejemba ken aser music adokdaksütsüji kanga tongtibang ta ashiba den kentenertem dang tatishitsü aketba taküm kaka asütsü ajungshi.

Sentong nungsa Medoselhou Keretsü-i Maleate telok atema temaotsü meshizüka sarasademtsü. Iba sentong ya Khedi Baptist Church pastor Dr Ruokuovilie Sachü lenisüba nung agia liasü.

## Digital Design Labs for Livelihood Generation semzüktsüogo



**Shillong, Metsüremi/March 11 (TYO):** Secretary, NEC, K. Moses Chalai, IAS-i Don Bosco Technical School, Shillong nung Hokolbarnü Digital Design Labs for Livelihood Generation semzüktsüogo.

Iba sentong nung Sherry Lalthangzo, Economic Adviser (E&M), NEC, S Sundar, MD, AMTRON, Guwahati, Fr. Sagi Stephan of Don Bosco Technical School, Shillong, Tanung Jamoh, Director (S&T), NEC, ALIMCO officers aser NEC Senior Officers tem densema liasü.

Iba project ya NEC-i sen crore 5 intoka ACC Institute, Senapati, Manipur den longjemer tenzüka liasü. Iba centre ajanga Graphic Designing daser Animation den high end Softwares amala technology tem amshitsü atema training agütsütsü.

Iba sülen 3D printing, 5G applications, digital designing of training, North East nung

jembiba oshitem densema oshi balala agi instructional videos/ 3D Animations yanglutsü atema tangazükba agütsütsü.

Sentong nung Leihaothabam Johnson Sharma-i o tatsüka jembiba shiba instructor aser mentor ka lir. Pa ya nüngtugu Digital Designer ka lir shibai ajaki meteta aliba Hollywood, Bollywood project tem aser nüngtugu TV Programme tem nung shilem agiogo. Pa tang bendanglen nungi densema nüngtugu Institutions tem den longjemer digital learning atema bendanga agüja inyakba mapang ka lir. Pai iba project ajanga NER nung aliba lanurtem nem maongka aika agütsütsü aliba indang jembiba liasü.

Digital aser 4.0 Industry tejakdangi bener aotsü atema NER nung iba project ya tenzüko aser iba ajanga tarutsü nung Digital space nung maongka aika agütsütsü aser nükla ulushitsütsü. Ministry of IB den longjemer NEC-i

Animation 3D courses ta nüngja agütsür training sentong ka 2023 küm March ita Delhi nung aliba NER lanur 100 atema tenzüksütsü.

Kasa mapang nung Ministry of DoNER aser AMTRON na longjemer yakta NER State 8 nung 3D Printing project tenzüksü sentong lir. AMTRON den longjemer ano NEC-i NER state 8 nung 5G Applications training agütsütsü, koba taruba ita 2 mesüra 3 tsüngdang tenzüksü aser iba ajanga maongka aika agütsütsü, kechiyong 5G benoka inyaksangshi tenzüko.

NER nung talisa lanurtem atema mapa manguba tebilemstü aser rongsenketzung jenjang melshitsü atema tetsükdaksü aika lir. Iba project amenokba ya Ato Kilonser-i Shillong nung 2016 küm NEC Plenary nung jembiba mapang NER nung rongsenketzung melenshitsü nüngdakba indang lemsatapa nung shilem ka lir.

## Army recruitment atema tenüing züngoksemstü anogo atsülangtsür

**Kohima, Metsüremi/March 11 (TYO):** Agniveer ama Indian Army nung adentsü atema online registration mapang anogo pongu agi atsülangja March 20, 2023 kümtsüogo. Taoba mapang tenüing züngoksemstü atema tatembangbuba anogoji March 15, 2023 liasü.

Candidates temi parnok indang Aadhar card mesüra class 10th certificate tem amshia pei sasa züngoksemstetsü. Tenüing züngoksemstü atema taa 500 alitsü ajisüaka registration mapang UPI, Credit card, Debit card mesüra Internet Banking amshia sen 250 dang agütsütsü. Tanungba sen 250 ya Indian Army-i agütsütsü. Online transactions atema candidate tem ket nung activate sür aliba debit card alitsü nüngdaker.

Recruitment mezüngbuba shilem nung züngoksema aliba candidate tem ajak examination centre balala nung online

Common Entrance Examination (CEE) ka agütsütsü. Nagaland nung examination centre ana aser Manipur nung examination centre asem lir.

Indian Army-i asayartem, NCC certificate bena alirtem aser ITI qualified candidates tem nem shimshiraba mapang bonus marks agütsüogo.

Iba mapang atema koda apply asütsü aser Online CEE tatidang koma agütsütsü, iba dak sendakba nung tongtibang video ana Join Indian Army website, <https://www.joinindianarmy.nic.in> nung angutsü.

Ken o jangjashitsü atema Army Recruiting Office, Rangapahar Military Station, Dimapur, Nagaland den item phone No. 03862-249012 aser 8974958673 ajanga tongteprateptettsü, ta PRO (Defence), Kohima & Imphal sangdong ka ajanga metetdaksü.



Raj Bhavan, Kohima nung his excellency, Shri La Ganesan nem tetushi agütsüba sentong nung Tongpang Ozukum-i shilem agiba noksa nung angur.

## Assam Rifles-i sentong balala ayonzüka agi

**Dimapur, metsüremi/March 11 (TYO):** Assam Rifles Kohima Battalion-i asür L/Nk Padam Bahadur Sunwar' bilemteta Kohima nung naro toktsüba sentong ka ayongzüka agiogo.

L/Nk Padam Bahadur Sunwar'-i 1996 küm March ita 11 nü telungpurtem den raraba mapang pa taküm bendanga agüja liasü. Pai kanga tasü ita rara aser Aizawl, Mizoram nung duty nung aliba mapang pa taküm bendanga agütsü.

Assam Rifles Ghaspanti Bn-i, John Bosco School Upper Khonoma Kohima dist, Nagaland nung March 9 nü John Bosco School Annual sports meet lapokba sentong ayongzüka katsüogo.

Iba sentong nung tongti tesemdang ama Asst Comdt Adeep Tamang-i, iba league nung kanga yakyaka shilem agitsü atema kaketshirtem ajungmeso aser iba asayamung tenzüka liasü.

Iba sentong nung kaketshir 100 shi aser school staff 20-i shilem agia liasü. Lanurtem nem tashi agütsütsü aser saisapong ajungkettsü atema Assam Rifles-i jenjang tajung agiba atema asayamung ayongba committee-i parnok dang kanga pelaba lemsatapogo. Sentong nungsa AR-i school principal nem asayadang amshiba osettsüt balala agüja liasü.

Kasa mapang nung Assam Rifles Ghaspanti Battalion-i, Niuland district kübok Ghokito yimtsüing nung customary court

ajungkettsü atema computer aser digital accessories tem agüja liasü.

Lanurtem yongtsü nung Computer literacy ajungkettsü aser Customary court nung Infrastructure tajungba küma yanglushitsütsü atema Op Sadbhavana Project 2022-23 kübok Chair 56, Central Table 05, Laptop table 02 and portable water purification system 05 tenla agüja liasü.

Yimtsüing Chairman, GB aser tanga Council züngsemtemi yimdaklirtem aser lanurtem tenüing nung osettem agizüka liasü. Security Forces-i teyari tulu agütsüba atema parnok dang kanga pelaba yimdaklirtemi lemsatapogo.

Maneni HQ IGAR (North) kübok Assam Rifles Shamator Battalion-i, Op Sadbhavana sentong kübok Noklak District nung Chilliso Village Council nem computer den printer aser Solar Lights tenla agütsüogo.

Iba mapang tajung inyakba atema yimdaklirtemi kanga pelaba lemsatapogo, kechiyong iba ajanga Chilliso Student union, Village council aser Chilliso Women Council indang document tem digitally rizüing ayutsü atema lenmag lapoktsütsü aser Chilliso yimtsüing nung aliba kaketshirtem nem Computer amshiba yimya angazükdaksütsü asoshi teyari agütsütsü.

Iba project ajanga nüburtem mulung koktetogo aser Security Forces noksa tajungba kümdaksüogo.



March 11, 2023 nü Rashtrapati Bhavan, New Delhi nung Ato kilonser, Narendra Modi aser Tir, Droupadi Murmu na senden amenba sülen tangokba noksa nung angur.

### Japan Ato kilonser Kishida-i India semdangtsü

**New Delhi, March 11 (Agencies):** Tawa India nung Australia, Germany aser US nungi ketdangsertem aika agizüka liasü aser maneni March ita nunga Japan tongti ketdangseri India semdangtsü, ta Ministry of External Affairs (MEA)-i metetdaksü.



Kishida Fumio

Japan Ato kilonser, Kishida Fumio-i March 20- 21 anogotem nung India semdangtsü; pa Ato kilonser akümba sülen tang agi tanabenbuba India semdangtsü, ta MEA-i metetdaksü.

jaoktsüa akok.

Yaküm March ita nunga Japan Ato kilonseri India semdanga India-Japan Economic Forum senden nung dena liasü.

Japan leniri India semdanga mapang nung Japan-India Special Strategic Global Partnership tajungba akümtsü atema jembitsü aser Indo-Pacific atema-a jembitsü, ta osangbenertem senden ka nung Japan Chief Cabinet Secretary-ia metetdaksüo.

Ministry of External Affairs-i sangdong ka ajanga, "Japan Ato kilonser, H.E. Mr. Kishida Fumio-i March 20-21 anogotem nung India semdangtsü. Pai semdanga mapang nung India Ato kilonser Narendra Modi den senden amentsü. Linük anati linük tsüngda tesendaktep aser regional onüktem nung o lemteptsü," ta metetdaksü.

Ano tanga osang ka nung, External Affairs Minister, S Jaishankar-i Japan International Cooperation Agency Tir, Dr. Akihiko Tanaka den senden mena JICA aser Indian infrastructure & connectivity tsüngda amalitep atema jembio.

India aser Japan na leniba nung G20 aser G7 senden amentsü, anungji ministerial level senden nung iba atemaji-a jembitsüa akok, ta MEA-i metetdaksü.

Jaishankar-i twitter ajanga, "Linük ana tsüngda amalitep jenjang tajungba akümtsü atema human resources nung invest asütsü aser amalitepa inyaksü nungndak. JICA-i iba tayongzükbaji agizüktsü imlar," ta metetdaksü.

Taküm May-19-21 anogotem nung Japan nung G7 Hiroshima Summit nung adentsü atema Japan leniri Modi

### Tanü PM-i Karnataka nung terenlok project aika semzüktsütsü

**New Delhi, Metsüremi/ March 10 (Agencies):** Amongnü Ato kilonser, Narendra Modi-i Karnataka semdangtsü aser pai sen crore 16,000 indang project balala semzüktsüba den külemi project tasen atema foundation lung azüngtsütsü.

Assembly elections April-May nung agitsü.

Modi-isa Bengaluru-Mysuru Expressway semzüktsütsü. Iba project kübok NH-275 nung Bengaluru-Nidaghatta-Mysuru section six laning densema lir. Kilometer 118 talang project ya sen crore 8,480 shi indoka yanglugo.

overbridge pezü, tongtibang apu teku, apu tila 40 aser underpasses/overpasses 89 yanglugo, ta metetdakja liasü.

Kasa tweet ji Modi-ia lemsatepa, "Iba ama kanga tongtibang connectivity project ajanga Karnataka ainba nung yaritsü," ta metetdaksü.

Anüngdang 12:00 ako meta Modi-i Mandya nung gari lenmang projects atema foundation lung azüngtsütsü, iba sülen nikongdang 3:15 ako meta pai Hubballi-Dharwad nung terenlok project balala semzüktsüba den foundation lung azüngtsütsü, ta Honibarnü Prime Minister's Office sangdong ajanga metetdaksü.

Iba project ajanga tamalen Bengaluru nungi Mysuru atongtsü ghonda 3 agia aliba nungi tangbo minute 75 shi dang agitsü, ta PMO sangdong ajanga metetdaksü.

Modi-isa Mysuru-Khushalnagar four-lane highway atema foundation lung azüngtsütsü. Kilometer 92 talang lenmang project nung sen 4,130 indoktsü. Iba project ajanga Kushalnagar aser Bengaluru tsüngda senzüba ghonda 5 agia aliba nungi ghonda 2.5 dang agitsü.

Iba project ajanga region nung loktiliba-rongsenketzüng tsütsü terenlok alitsü, ta sangdong nung shia lir.

Hubballi-Dharwad nung Modi-i IIT Dharwad semzüktsütsü; 2019 küm February ita nung Modi-i iba institute yanglutsü atema foundation lung azüngja liasü.

Karnataka nung assembly election agitsü mapang ana nung lia taküm küm kija nung Modi-i iba state trokbenbuba semdangtsü. Karnataka nung

Honibarnep Road Transport & Highways Minister, Nitin Gadkari-i twitter ajanga, Bengaluru - Mysuru Expressway kübok railway

### ED-i Lalu Yadav'er kibong mita aoba mapang sen lakh 53 apu

**New Delhi, March 11 (Agencies):** Mapa atema aliojen agiba ochimashi ken o dak sendakba nung Enforcement Directorate (ED)-i taoba mapang Union Railway Minister, Lalu Prasad'er kibong züngsemtem aser külem inyaksemetem ki mita aoba mapang nung sen lakh 53 den hon gram 540, hon agi yangluba osetem seret 1.5 aser dollar sen 1,900 puogo.

tesem 15 mita oa liasü. Tawa Central Bureau of Investigation (CBI)-ia taoba mapang Bihar Chief Minister, Rabri Devi aser Lalu Prasad na dang asüngdangyaogo.

kati metetdaksü. Bihar yimtiba, Patna kija nunga mapa atema nisung aiakti parnok kiojen yokadok aser Yadav'er kibong züngsemtem nem aser Yadav'er kibong indang nija company ka nem agütsü.

ED ketdangser kati ashiba agi, Hokolbarnü ED-i RJD lenir aser Bihar Deputy Chief Minister, Tejaswi Yadav'er ki (Delhi nung aliba ki) densema

CBI-i Lalu Yadav aser pa kinüngtsü Rabri Devi, jala ana aser mejangjaba nisungtem densema nisung 15 anema ken o benoka liasü.

Zonal Railways nung substitutes shimtsü atema advertisement magütsü mesüra public notice magütsü, saka item mapa atema shimokertemji Patna nungi liasü. Mumbai, Jabalpur, Kolkata, Jaipur aser Hazipur nung aliba Zonal Railways nung substitutes shimertemji Patna nungi liasü, ta CBI-i tai tonglokja FIR benoka liasü.

2004-2009 nung Lalu Prasad Yadav Railway Minister inyakba mapang nung Railway Zones balala nung Group "D" posts agütsütsü atema par kibong züngsemtem tenüng nung aliojen agia liasü, ta ketdangser



New Delhi, March 11, 2023: Delhi excise policy ochimashi ken o dak sendakba nung Honibarnü Enforcement Directorate (ED) office nung BRS MLC, K Kavitha dang asüngdangyaba mapang tangokba noksa nung angur.



March 11, 2023 nü Meerut nung linük tatong Tir, Jagdeep Dhankhar, Uttar Pradesh Angh, Anandiben Patel aser Uttar Pradesh Chief Minister Yogi Adityanath nungeri 'Ayurved Mahasammelan' sentong nung exhibition reprangba noksa nung angur.

## BECOME AN ENTREPRENEUR

Get equipped with the best business Knowledge to Start or Run your Business

**Reach us at :**  
+91-7005717387  
+91-8399951403

**Tentative Date:**  
05<sup>th</sup> April 2023

**Duration of Programme :**  
4 Weeks

**Register Now**  
APPLICATION FORM AVAILABLE  
AT : [www.ile.gov.in](http://www.ile.gov.in)

Join us FOR **THE ENTREPRENEURSHIP DEVELOPMENT PROGRAMME**

**Venue I :** Dimapur , House No.- 50, Khuda Village, Pehelie place, 1<sup>st</sup> Floor,Dimapur, Nagaland – 797112

**Venue II :** Kohima  
Entrepreneurship Development Centre, Department of Employment, Skill Development and Entrepreneurship, Lower Bayavu Hill, Kohima, Nagaland - 797001

Supported by Department of Employment, Skill Development & Entrepreneurship Govt. of Nagaland

Organized by Indian Institute of Entrepreneurship (An Autonomous Organization under the MSDE) , Govt. of India



# TIR YIMYIM YIMOBILEM (EDITORIAL)

DIMAPUR AMUNGNÜ, METSÜREMI(MARCH) 12, 2022

## Ochiba Tsüngrem

**A**iben asenoki Ochi ta asüba ya tangatetba ojang ka dang amai bilemer, ajisüaka Ochi ya tebilemba mesüra tangatetba ka masü saka ochia ya Tsüngrem aser asenok Tsüngrem ya ochi Tsüngrem lir. Kodang asenoki angatetba dak ajemdaker bilemdangdir, asen akaba agi asenok kodanga timmedemi jangratema alitsübaji ochi amai bilemtsüa akok. Ano külen asenok makamait timatemdang, asenoki kodanga jangratema malitsü amai bilembajiang ochi amai bilemtsüa akok. Iba kasaji asenok kanga mejungi shirangba mapang, tanepsü mengui asütsübajiang ochi ta bilema alitsüa akok. Iba kasaji Yisu nütsüngtemia kenü anogo tzüim nung yipru tulu aitba mapang, parnok taküm samatsübajiang ochi amai bilem, anungji parnoki Yisu dang, " Tesayur, tesayur, asenok samadagi," ta ashiba Luke tapu ti nung shia angur. Kodang asenoki iba tatalokbaji jungjunga reprangdangdir, nütsüngtemi parnok samatsübajiang ochi amai bilemaka, Ochibo parnok amenba rongnung mejangadoker liasü. Ochi jagi parnok mesamadaktsütsü ta meteta liasü saka parnok dak ochi malibayong parnok tasümayit aküm aser tsübua adok. Ashiko, tzüim nung senzütsübaji nütsüngtem asoshi kecha tebilemtsü ka masü amai bilema parnok apuso südi, kechiyong nütsüngtemji tzüim nung ango pua senzür mongintem liasü. Parnok asoshi tzüim nung yipru aitbaji kecha balaka tesüngmangtsü aser tetsübuttsü masütsüba ser nung, parnok tsübua adok, kechiyong parnok den Ochi mali asü. Iba kasaji asenok taküm nunga ochi amui oa toktsür asen inyaknütsü inyaker. Aji oda, aseni jembiba aser inyakba kecha nunga ochi mali asenok sünütsü süa inyaka aodang, asen taküm aser kibong nung ajungbena tzüim yipru aiter ama lendong timtem tulu ataloker. Idangji, asenoki Yisu nütsüngtem dak atalokba shisabolu mapang ya bilemtetdi. Aiben asenoki aseni metetba tashitemetet, asenok akaba rongsen aser nütsüng züinba dak temulung lemer ochimashi agi tangar ashiocksüba aser timtemdaktsübajiang ochi amai bilema inyaka alitsüa akok. Iba ama alima shi asüküm aser morumoru shisatsü agi asenok nungi Ochi pilar aliba tensa tiaji asenok Tsüngrem medeni asenoksasa jajaba mapang asütsü. Ibaji kanga lendong aser shisabolutsü mapang lir. Yisu nütsüngtemia kodang Yisu bushia oa mesoa parnok shisabolu ashi, idangjiang parnoki ochiji metet. Yisu den jajaba mapang, Pai sayatonya mapa inyakba aika nütsüngtemi ngua liasü. Ajisüaka, parnoki Yisui dang kümzüker ta asüba ochi o ji memeteti liasü. Yisu medenia parnoki parnoksasa litettsü amai bilembajiang parnok asoshi ochi amai liasü. Tanü asenok taküm nunga asenok dak lendong ka matalok tashibo mesüra tasütsüsa timtem ka maru tashibo asenoki Yisu mebushir, iba jagi asenok tsübuseta dang alir aser aiben takoksa tia ajurur. Yisu den lira, asenok kodanga mesamatsü ta asüba Ochi osang tajung dakji dang asenoki amangtsüla. Yisu den külemi rong ka nung jajar saka asenok samatsü tsübur ta asüba tiaji Yisu denbo jajaner saka ochishia melitetter ta asüba taküm asütsü. Jokorla, asenokbo ochi Tsüngrem dak amanger asünungji, asenok asoshi Ochi ya Tsüngrem lir ta angateta Ochishia alitsü merangtsüla. Yohan tapu 14 nung, Yisui ni 'Ochi' lir ta ashibaji taküm o lir. Iba o jagi dang, asenok ochimashiba ajanga timtem lendong ajurutsü ta sowar ama memeteti aliba tia nungi nüchi küma asenok takoker dang nungia taoba aser tuluba küma jangratema alitsü.

# OLEMSABANG

## IBA LIMA NUNG TAJUNG O TAMAJUNG NA MEDEMDANGA YAMAI ATALOKYONGA AOKA ANGUR

-R.Imkong Lkr, Aolijen Mepu, C.T.C, Mokokchung

(Yashi adok nungi...)

16. Nisungtem rongnung karbo anojungi ali rongsen kanga züiner aser pa makatsü kecha maka nungji alima nung tasoshia langa jangratema alir.	16. Saka nisungtem rongnung karbo takatsü kecha maka nung kenü tanga jangratema melidangba lir, oda pa akaba ajak agi anogoshi chi auso ka metitemi chiyongtsüba tang lir.
17. Nisungtem rongnung karbo tachi tajemtsü peria yur jangratema chia jema pelaseta dang alir, aser mapaa teinyaknütsü ajak jangratema inyaka dang alir.	17. Saka nisungtem rongnung karbo achi ajemtsü peria liaka pa mesüra la achitsüsa chiyongtsü kecha mekai aliba angur, ya kechi tai ajanga ataloker?
18. Nisungtem rongnung karibo saisabong tapu ajak nung shilem tajung agiteter aser senpet tajung aika nguteter.	18. Saka karbo pei temang nung mekokmin agi sünger teti ayako tena dang aliba ajanga kecha nunga shilem tajung magiteter. Ibaia teshisadangtsü rongnung ka lir.
19. Nisungtem rongnung karibo tazünga nung degree 5, 6 tashia nguteter liakah ano talila züngloka oteter, kechiyong Tsüngremi parnok nemji tekuluk shisatsü balaka agütsür, koda jangratemtsü sempettem alir.	19. Saka nisungtem rongnung karibo matric exam-a passed mesüteter, anungji parnok jagi tanga exam kar agütsütsübajibo otsü mali akümer. Koda tesasatsü nisungtem sempet lir.
20. Nisungtem rongnung karibo mapa tila terika inyak nung yangjia temoatsü kanga angur, ajita süra kodang parnok jagi kodang mapa tulu kar inyakdir, idangjibo pai tangartem ajak ajateta takar akümer.	20. Saka nisungtem rongnung karibo maparen kar kanga kümdanga temulung agüja inyakaka pai inyakaba maparen nung khen agi temoatsü malir, saka kodang pa mesüra la jagi maparen tulu kar inyakdir idangjibo pa mesüra la tu tkaüm tepiyong mesaktettsüsa akümer.
21. Nisungtem rongnung karibo mapa tila teri ka inyakdang temoatsü anguba den konang nüngsanga tulu angur.	21. Saka nisungtem rongnung karibo mapa tila teri ka inyakdang pa-ng zübu tulu keta yirur alir.
22. Nisungtem rongnung karibo nüburtem matsüngdang maaksü aser tatala timtem jenti aremzüka inyakdang taküm aser Tanela ajak ajangzüker alir.	22. Saka nisungtem rongnung karibo kanga tiyaksanga tulu küma shisangnüdang taküm piyong atema pei taküm aser Tanela anaprongla samatsüsa akümer.
23. Nisungtem rongnung karibo pei sasa kanga tila küma ajak kübok alitsü merangdang lendong tapu ajak nungi kümzüker, iba denji pei Tanela dena ajangzüker alir.	23. Saka nisungtem rongnung karibo pei sasa tulu küma lendong tului aitsüsa akümer, iba denji pei kinungertem dena maaksü tulu ngudaktsür.
24. Iba lima nung tashi tulu aketba tapu asem lir, mezüngbubaji ali nung raraba sepaitem ya lir, tanabubaji azük nung anüng tom nung raraba sepaitem ya lir aser tasembubaji tzüyim telong nungi raraba sepaitem ya lir. parnokji tasü tait alima jongtem lir, aser sepaitem shia pei kuluk shisatsü yari temaba jenjangi atur aser parnok rongnung karibo temaba menden jenjang tashia tuteter. Saka alima tongbang tesashi raradang tia makartem aika rara nungi taküm lalur saka parnok taküm laluba ajanga tang pei limaji kümzüka yutsür aser alimai parnok kodanga mamateter.	24. Alima nung akhüm taket sepaitem rongnung karibo samesa mapa tamjung inyaktsü tang teti jangra alir, oda sepaitem rongnung karibo mapang kabo pei shi azü jangratemnüdang sorkar tashi tulu amshia mashi mapang ka nung tatishitsü agi Mon District nung atalokba ama, pei arür den masü saka ochishir yimdaklirtem den tapi agi bomb aser injang tesashi amshia taküm jenti samatsüba ngua angashia aruogo. Aser ano samesa sepaitem karibo maaksü mapatem aikasa bener arutsür aser pei lima tubo amadoker tetsür tanurtem dak tashiyim agi, tia makartem karbo taküma samatsür aser parnok rongnung karbo akümüli tepiyong tashidak tulu agi kangshia lir külen tatem nung pei taküm tembanger. Aji oda sepiatem shirnoki mapa tamajung inyaker parnok takümtemjia aiatai tia nung tembanger.
25. Iba lima nung mezüng kibong ka tenzüka aobaji Adam aser Eva na liasü ta Lipok lai nung shia angur. Ibaji mesüka tanüa aikati pei kobong ajungtsü atema meranga inyakteper, yamaji kar kibong nungbo Yisui sayuba meteta inyakba ajanga pei kibong nung tesünep nung liyonga aoba angur aser item amala kibong nung jagi tanurtem rongnung tular aser yimsüsür aika adoker. Aser kar kibong nungibo Tsüngrem metetba tanurtem jenti adoker, aser item amala kibong nung jagi kotak tongtettsüsa tamangertem adoker.	25. Saka kar kibong nungbo mejangmero agi sünger oda balalulatsüsa akümer, item ama tatalokbaji tongtibangsa tenük mero meroba ajanga ataloker. Aser kar kibong nungibo tanurtem rongnungi nisung tepseter adoker, aser kar kibong nungibo kinungtsü ajanga alima shi azü tsütsülen mazüokba ajanga oda pei kinüngbora dena mashileni anir aotsüsa akümer, aser tatem nungbo pei talidak ki dena mekai akümba angur, saka parnok teti alitsüba kijibo molumi kanglaji dang akümer. Taküm piyong amanga aruba tu aiatai tia nung dang tembanger .

(Maneni asüng adok nung...)

### Madhya Pradesh nung Tenla ki amakba ken o nung nisung 3 puogo



Taoba ita Madhya Pradesh kübok Narmadapuram district nung Evangelical Lutheran Tenla ki telung rongoktsür aliba noksa nung angur.

**March 11, 2023:** Tawa Madhya Pradesh kübok Narmadapuram district nung Protestant Tenla ki ka amakba ken o dak sendakba nung police-i melung melemi nisung asem puogo.

Tang pua aliba nisung asemji arrshi küm 20 temapurtem dang lir.

February 12 nü Evangelical Lutheran Tenla kidang mi senoktsüba, Tenla ki telung nung Laishiba, yimsü kakettek, menden aser senpong raksatsürtemji parnok liasü ta melung malemer.

Tang par asemprong Kesla Police Station nung judicial ket nung lir.

Evangelical Lutheran Arogo nung pastor, Mahesh Kumre-i aibelenertem tekaraba nung apuba atema police nem tenüngsang

agütsüogo.

Pastor-i, police-i onok nem Tenla ki jabi agütsüogo aser Tenla ki merüktettsü tuyuogo, anungji kobi melii Tenla kidang tekülem sentong agi tenzüksü, ta metetdaksü. Tamalen January ita nunga Catholic Arogo Tenla kidang Laishiba rongdoktsürtem aser Itarsi jila nung aliba Evangelical Arogo Tenla kidang Laishiba rongdoktsürtemjia kasa nisungtemjisa asütsüa akok, ta police-i bilemer.

Narmadapuram district nung Evangelical Lutheran Arogo Tenla ki ya küm 6 tejaklen ang yanglua liasü aser Tenla kidangji nisung 1,000 dak tema menteter.

Aibelenertem jagi kichiba nung aliba insang raksar Tenla ki telungi tua Laishibatem, sarasadem

leniba kakettek, menden, bangka aser Tenla bendenba senpong ajak rongdokja liasü. Iba dak alia Tenla ki telung nung 'Yisu' ta zülua alidak Hindu nung tsüngrem 'Ram' Hindi oshi agi zülur liasü.

Nütsung million 72 dak tema aliba state Madhya Pradesh nung Khristan nütsungbo shilem 1 dang nungi tajemba lir (shilem 0.29 dang lir).

India nung state 11 nung anti conversion ozüngtem benoka lir, aser item state rongnung Madhya Pradesh-a densema lir. Iba ozüng kübok Khristan mesüra Islam yimsü dangi meyipertem küm 10 tashi tepuokdak ayutsü aser senchi-a achitsü. Iba ozüng ya 2021 küm Madhya Pradesh state assembly nung agizüka liasü.

### ANOGO ABEN TSÜNGREM DEN

#### Telemtetba shitak agiba

*O bendang tajung aser temetetba shisatsü kü dang sayuangma.*

*T. Ken 119:66.*

Asenoki telemtetba shitak agira taküm junga alitsü. Solomon-i telemtetba shitak agiba ajanga tenüng tajung angu.

Kodang pa chuba aküm pai shisatsü meshi. Anogo shia asenoki telemtetba shitak agitsüla, saka aiben asenoki meshisadangi shimtetter, kechi adoktsü aji mebilemdangi tenük amur shimtetter.

Ajaki telemtetba tejangja yur inyaker. Shingaia mebilemdangi inyaker mesüner. Telemtetbaji asen meyong, süra asenoki tangar asoshi aser pei asoshia junga shisadanger telemtetba agitsüla.

Telemtetba agiba nung tongtibangtibaji ajemaluba ya lir. Asenoki telemtetba mejungi agira, ibai tai ta ajemalua agizüktettsüla. Obendangba nung tashi maitji alima meimchir ajak tashi mait lir. Kar dang nungi tajungba bendangtetsü akok, saka shingai iba tashi mait nungi jenbua melitetter. Aseni tai bendangra, asenoki shitak bendangtsü merangra aser Tsüngremi mulungba nung alitsü merangra aser asenoki taidok bushira, Khrista tenüng nung asenoki aibelena bendangba ajakji taidok agütsütsü ta asenoki metet. Anogo shia asenok telemtetba shitak agitettsü Tsüngrem dang shisatsü meshia sarasademdi.

#### AMANGBA PUR TANGI TSÜNGREM TANÜLA TEMESHI OSANG KA YAMAI SANGDONGER :

Ni anogo terok (6) tashi election sen aser chiyungtsü kecha mech-i metangshi-i koma election ya akar repranga senzü. Tsüngremi yamai kü dang ashi, Feb 26, 12:00 ako nung menenok tulu arutsü ta ashi, aser ibaji ni aliba ki nungji kanga dang sashia anokshia sayu. Ni manokshiba ki kati atu nung Tsüngrem Tanelai yamai ashi, 90% tamanger menonok agi anokzüka yokogo ta ashi, Tsüngrem lar-a rongsen anoksatsüogo ta ashi. Arung adianutem aour nem-a tadok agütsüba Yisu shiba Kangki dong nung asü, Pa dang tadok meshidi ta ni mepishia ayongzüker.

~ L. Tali Aier, Kohima

### Germany nung Arogoi kasa o kasa kibong kümer alirtem moatsütsü



March 9, 2023 nü Germany nung Catholic putirtem aser lenirtem 'Synodal Path' senden nung vote agütsütep dang tangokba noksa nung angur.

**Berlin, March 11 (Agencies):** Hokolbarnü (March 9, 2023) Germany nung Catholic putirtem aser lenirtem tsüngda senden ka mena Arogoi kasa tetsür o tetsür na mesüra tebur o tebur na kibong kümer alirtem moatsütsü atema telemtetba agiogo.

Anogo asemnü senden ya 2019 küm tenzükba "Synodal Path" shilem ka lir.

Hokl barnü senden nung shilem agir teimbakati (176) kasa

tetsür o tetsür na mesüra tebur o tebur na kibong kümer alirtem Arogoi moatsütsü pusema vote agütsü.

Syndoal Assemble-i ketdangsüba Syndoal Path ya züngsem 230 aliba high-level conference ka lir. Arogo tesayubatem aser inyakyim melenshitsü atema Germany Catholic Church-i iba conference ayongzüka akar.

Kaket tapak pongu nung aliba document, "Blessing ceremonies

for couples who love each other" ji vote 176 ajanga agizüka liasü.

Nisung 14-i iba telemtetba anema vote agütsü aser nisung 12-i vote agütsüba nungji shilem magi.

2026 küm March ita nungi tenzüka Arogoi kasa kibong kümer alirtem moatsütsü.

Arogo aikati kasa kibong kümer alirtem moatsür, ajisiüka Catholic Arogoi official süabo ibaji magizüker.

Taküm January ita nung interview ka nung jembidang Pope Francis-i, iba ama inyakyim ya teraksatsüba tangatetba ka asütsü, ta metetdakja liasü.

Germany nung putirtemi agiba telemtetba ya Vatican aser Pope Francis tetuyuba anema lir, kechiyong Vatican-i, "Arogoi temenen moatsütsü makok," ta ashir.

2021 küm Vatican orthodoxy office ajanga züngsem Arogotem dang, kasa o kasa kibong kümer alirtemji Arogoi moatsütsü makok, kechiyong ibaji ajanga Tsüngrem jashidaktsütsü, ta metetdakja liasü.

### IS kiralongrartemi Congo nung Khristan 35 tepset

**Dakar (Senegal), March 11 (Agencies):** Islamic State (IS) kiralongrar teloki sangdong ka ajanga, parnoki anüdoklen Congo nung Khristan 35 tepset aser aika yirutsüogo, ta metetdaksü.

Hokolbarnü (March 9, 2023) IS telok indang news agency Aamaq-i, Congo nung North Kivu province kübok Mukondo yimdak parnoki prangpong aser kotari amshia Khristan aika tepset aser kiojen rongdoktsüogo, ta metetdaksü.

Parnoki ki aika rongdokdang tangokba noksa-a lemsatep.

Taoba hopta IS den tesendaktep aliba Allied Democratic Forces (ADF) telokia yimtsünga aika amakdang nisung 45 tepseta liasü, iba sülen tang IS-i iba osang sangdonger.

Brihostibarnü Mukondi yimdak Khristantem asüpila sentong agia tasümgang remogo.

Congo nung United Nations peacekeeping mission-i Khristantem tepetba aitsüogo aser Congo sorkar ketdangsertem dang iba tatalokba bushistingdangtsü aser

aibelener aputsü takhangba agütsüogo.

Tesüiba küm aika anüdoklen Congo nung rara manener. Iba linük nung prangpong amer telok 120 dak temai tashi rakteper aser karibo pei nisung kümzüksü atema inyaker.

ADF telok ya North Kivu province nung yakyaka lir ajisiüka tawa ka nungi parnoki anasa aliba Ituri province aser regional capital, Goma nunga amenoka timtem agütsür.

Uganda aser Congo sepaitemi longjemer ADF anema rarar ajisiüka iba telok anema tulukabo meinyakteter, ta yaküm December ita nung U.N-i metetdakja liasü.

ADF teloki tanurtem densema civilian apur aser tashiyim amshia raksatsür, ta U.N. aser meimchir temeden atema inyakba telok balalai aitsür.

Tan ita tetenzüklen United States-i, ADF tongti lenir, Seka Musa Baluku aputsüsa shibai osang agütsüdir mesüra tepsetdir senpet dollar sen million 5 agütsütsü, ta sangdongogo.

AO OSHI ANGAZÜKDAK:

TANÜ ANGAZÜKTSÜBA OJANG



Pelem

(v) shi aut tatsük nung yabanger mendaktsü ( roast under hot ash in fireplace)

\* Asenoki shi takong aut tatsük nung pelema mendaktsür lon asür.

Pelep

(v) teküp telong nung aliba temai adokdaksü (inside out by pulling back skin)

\* Awazürtemi ak tar mit aser jungjunga pelepa shitoker aso.

OLONG PAITEP # 6453

Grid for crossword puzzle #6453 with numbered squares.

TIPLÉN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6452 TELANGZÜBA

TIPLÉN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Sujak, 10. Aonung, 11. Dokan, 13. Tinu.



NAGA NUNGER POLITICIAN ATEMABO PARTY MANIFESTO KECHA MALI

Osang Zülür : Mr. Alok...Na tang Election nung takok ngur MLA kumogo ta angazüka kanga pelar...Surabangla na Rulling Party nungi adok asü koda ...???

Mr. Alokba : Sir...Ni Rulling Party nungi masü...Saka tanga party ka nungi adok.

Osang Zülür : Surabangla nenok Party tebilemba kechi...?? Tashi-tait opposition Party ka ama nubur tenzüksü asü...?? Rulling nung adentsü bushitsü...???

Mr. Alokba : Sir... Onok Opposition maliba sorkar ka akümtsü bangzünga renemogo.

Osang zülür : Waaa!!! Naga nunger Politician-tem yabo Party Manifesto nung akanga ametba-a kecha mali.... Party ticket ammer Election-i aiba tetezü maka... Oda Rulling sorkar nung Minister asütsüla aser Portfolio tajung amtsüla. India nungbo tanü BJP sorkari yimsu asüba ya... Congress sorkar-i küm lir-tenem yimsu asüdüng opposition nung arema amenertem tanü yimsü asütsü maongka ngur...Parnok inyaknuba nukjidong ataloka yimsu asür... Saka Naga nunger Politician-tembo MLA ka kümer pa/lai pei lima atema yabo inyaktsü ta nukjidong kecha maka asütsü sudi...!!!???

~ Lilir- L.Kika Pongener.

Assam nung süpokrem meshir ketdangsür 2 apu



Guwahati, March 11, 2023

(Agencies): Assam kübok Udalguri district nung ketdangsür anati süpokrem meshia agiba atema Directorate of Vigilance and Anti-Corruption, Assam-i puogo.

Tenaji Office of the Revenue Circle Officer, Kalaigaon nung Lat Mandal Kanak Chandra

Baruah aser No.1 Amguri, Kalaigaon Gaonburah (village headman) Dilip Borah na lir.

Tenati nisung ka dang land mutation documents yanglutsü atema Rs 10,000 süpokrem meshi.

Tenatisa süpokremji Rs 5,000 tashi ajem aser Directorate of Vigilance and Anti-Corruption ketdangsürtemi

Revenue Circle Officer, Kalaigaon nung tena aputsü atema tasa ka atong.

Dilip Borah-i süpokrem nungi Rs 4,500 meshia agidang Vigilance ketdangsürtemi angu. Iba sülen kuli tejangja nung ajemdaker ketdangsürtemi Kanak Chandra Baruah aser Dilip Borah na apu.

Tripura MLA temi Mar 16 nü tezüngzüktep agitsü

Agartala, March 11, 2023

(Agencies): Tripura indang state legislative assembly züngsemtemi March 16 nü tezüngzüktep agitsü.

Parnoki protem speaker Binoy Bhusan Das tsüngdang tezüngzüktep agitsü.

March 24, 2023 nungi state assembly tasenba indang mezüngbuba session alitsü. Indian Constitution nung Section 174(1) nung lateta aliba ama Governor Satyadeo Narain

Arya-i session ketdangsütsü ta state assembly secretary-i metetdaksü.

BJP, CPI(M), Congress aser TIPRA Motha dena telok balala nungi lennirtem adenba ajanga Tripura state assembly balaka asütsü imlar.

March 16 anepdang 11:00 ako nung Tripura Legislative Assembly indang session hall nung züngsemtemi tezüngzüktep agitsü ta ICA department-i metetdaksü.

Tan kümsük nung CPI(M) pur opposition nung madentsü saka Tripura putiotsü nung tang mezüng atema regional party TIPRA Motha-i opposition bench nung adentsü renema lir. Ajsüsiaka, Tripura cabinet nung TIPRA Motha minister ana anioktsü atema merangdar.

TIPRA Motha-i parnok opposition leader tenüng mashi lir saka TIPRA Motha MLA Animesh Debbarma-i opposition leader inyaktsü akok.

Barak Valley nung Burmese cow syndicate ajanga mapa inyaker

Guwahati, March 11, 2023

(Agencies): Barak Valley nung Burmese cow syndicate ajanga aonung shia Mizoram nungi Barak-i nashi meyirjang aika bener arur aser linük kübok tesem balala dangi fake letters ayoker.

Tesüüba ita ishika police nem iba osang sangokja arur aser Hokolbar aonung Hailakandi police-i nashi 16 apu,

Assam-Mizoram border arrtsü anasa aliba Hailakandi district kübok Bilaipur nung

nashitem apu.

Nashi ya Myanmar nungi miima bener aruba asütsü ta police-i temulung malemer. Parnokisa pacharkaris ana apu saka Barak nung cattle syndicate ya shibai tenzük'ar mejangjar.

Iba tesem nung ozüng alema nakmati, chemical fertilizers aser Burmese supari apuba sülen nashi apur. Ozüng alema Burmese cow syndicate maparen atema Barak nung aliba telok aikati tebilemstü

lemsatepogo.

February 28 nü Cachar police-i ozüng alema bener aruba Burmese nashi 17 apu. Osang tejangja ka angazükba sülen Katigorah kübok Lathimara tesem nung Burmese nashi 17 apu saka nashi shibelenertem jena ao.

Nashi 17 indang jenjangji lakh 25 shi ka asütsü ta osang angazüker. Police-i Barak Valley nung nashi shibelenba anema mapa tuluba inyaktsü tenzükogo.



NABARD-i ICAFI University, Tripura nung Faculty of Management and Commerce den yaritepa Hokolbarnü International Women's Day amongdang agiba noksa angur. Iba sentong nung National Teacher's Awardee Sutapa Sur, Assistant Commandant of CRPF Seema Singh, Tripura Inspector General of Police (Administration) Princee Rani, IPS, University Vice-Chancellor Prof Dr Biplab Halder aser NABARD General Manager Loken Das nung aden.

## Wagner tekolakbai sepai tasen anisemba metetdaksüogo



Yevgeny Prigozhin

**Kyiv, Metsüremi/March 11 (Agencies):** Wagner mercenary tekolakba Yevgeny Prigozhin-i, pai aniba Wagner private army-i Russia nung yimti 42 nung sepai tasen anisemtsü atema inyakyim tenzükogo, ta ashi. Ukraine kübok Bakhmut yimti nung raraba mapang takoksa tulu ajuruba sülen sepai tasen anisemtsü atema iba jenjang ya agir.

Hokolbarnü audio osang ka ajanga Prigozhin-i, nüburtem pai aniba telok nung adentsü atema tejakdangi audar ta ashi, ajisüaka nisung kwin anisem iba indang osang tejangja magütsü. Paisa, Russia army-i ammunition agütsüdar, saka tebilemstü keta lir ta shiogo.

"Ukraine nunger sepaitemi kanga meranga nokdangaka onok maneni tejakdangi aotsü. Jenjang ajak nung tetsükdaksü adokaka onok longjemer iba ya koktettsü," ta pai ashi.

Russia-i Bakhmut yimti atsüngtsü merangba mapang Wagner telok nungi sepaitem rara tesashi kar nung tejakdang ser raraogo, ajisüaka Ukraine army-i iba yimti maitsü maneni meranga nokdangdar.

Hokolbarnü social media nung osang tanga ka ajanga Prigozhin-i ashiba agi, Ukraine-i Bakhmut anasa tesem kar amaksü atema renemdar. "Iba

ya matalokdaksütsü asoshi onoki takokba tashi inyakdar," ta pai ashi.

Ukraine-i Bakhmut yimti nung maneni raratsü atema telemtetba agiogo, kechiyong iba yimti nung Russia nunger unit tajungtibatem densema lir aser Moscow-i metsü tsüngküm mapang Ukraine amaksü sentong aliba benoka minyak tsüngda parnok sepaitem aser hadirtem tashi meiti kümdaksütsü, ta Ukraine tir Volodymyr Zelenskyy nem teyari agütsür Mykhailo Podolyak-i ashi.

"Russia-i tasa melenshiogo," ta Podolyak-i ashiba Italy indang osang kaket La Stampa-i sangdonga liasü.

"Parnoki Bakhmut-i parnok indang professional army tanungba aser iba den private company tem densema training shidak agir aliba military personnel tem aika yokogo," ta pai ashi.

"Anungji onok nükjidong ana lir: takokba tashi temsüa aliba sepaitem tajemba kümdaksütsü aser parnoki tesem balala amakba minprongtsü aser metsü tsüngküm mapang rara atema onok indang resource tem rizünga atatsü atema tanga rara kar nung rangloker inyakdaksütsü. Iba tasa ya Bakhmut nung kanga takok ngua benoka inyaksangshidar,"

ta pai ashi.

Ukraine indang deputy defence minister, Hanna Maliar-i Hokolbarnü ashiba agi, Russia nungertemi tesem balala atsüngtsü atema merangba mapang onok indang sepaitemi tsükchirtem nem parnom tasa takok ngua benoka inyaksangshi mesükdaksütsü atema takokba tashi inyakdar.

Kasa mapang nung Prigozhin-ia, Bakhmut nung takoksa tulu ajangshiba agizükogo aser mapang ka nungbo Wagner telok nungi sepaitem aika asüba indang noksa dena lemsatepa liasü. Par sepaitem nem injang shidak magütsüba atema pa Russia military tekolaktem dena mangatetep adoka liasü.

January ita United States-i, Wagner telok nungi sepai 50,000 shi Ukraine nung rara-a alitsü, kong Prigozhin-i Russia kübok tepuokdak balala nungi tepuoker 40,000 anisemba densema lir ta asateta liasü. Russia nunger tepuokertem ya ita trok rara nung taküm mesamai raratetra tatok agütsütsü tenangzükba nung anisema liasü. Ajisüaka pai February ita ashiba agi, tepuokdak nungi nisungtem raratsü atema anisemtsü asoshi pa nem joko temelaba magütsür.

Ukraine nunger ketdangsürtemi ashiba agi, Ukraine nung Wagner telok nungi sepai 30,000 shi-iba telok toktsüogo mesüra rara nung tepsetogo mesüra yiruogo.

Hokolbarnüsa tanga audio osang ka ajanga Prigozhin-i, injang tali yanglutsü atema jenjang agiba atema Russia sorkar dang kanga pelaba lemsatepa liasü. Paisa, par sepaitem nem 2023 küm yangluba injangtem agütsür, ta ashi. Injang telongjunga yangludat aser iba ajanga nungdak ajak peritsütsü, ta pai ashi.

## China premier asütsü Li Qiang shimogo



Taruba China premier mapa abentsü atema tir Xi Jinping-i taoba Communist Party lenir Li Qiang shimogo.

**Beijing, Metsüremi/March 11 (Agencies):** Taruba China premier mapa abentsü atema tir Xi Jinping-i nominate asüsang parliament-i formally shimogo.

China nung yimti tulutiba Shanghai nung taoba Communist Party lenir Li Qiang lenisüba nung sorkar inyaksangshitsü. Pai Li Keqiang melenogo.

National People's Congress nung delegate 2,900 dak tema adenshir alirtem rongnungi ajunga amai arishi küm 63 tain lenir nem vote agüja liasü.

Pa ya Xi den kanga junga sendaktepa aliba nisung ka aser pa lenisüba nung China rongsenketzung mejungi kümer aliba asüngsashitsü atema inyaksangshitsü.

Minister tasen shimba osang Deobarnü sangdongtsü imlar.

China indang rubber-stamp parliament senden ka nung vote agütsütepba mapang osangbenertem ka danga arutsü memelai liasü.

Li, shiba China yimden yimsüsüba inyakyim nung lenirtem rongnung tanabuba jenjang nung lir pai vote 2,936 ngua liasü. Nisung asemi dang pa nem vote magütsü aser nisung ti senden nung medentet.

Li ya 2000 tetenzüklen tir Xi indang chief of staff liasü. Iba mapang nung Xi ya Zhejiang

province indang party tekolakba liasü. Li ya 2017 küm Shanghai indang party secretary kümdaksü.

Wara pokteter aliba mapang pa lenisüba nung Shanghai kanga sashia mokdanga ayu aser iba ajanga yimti nung alirtem karbo chiyongtsü aser mozü agi kanga anünga liasü.

Hokolbarnü tasembenbuba tir mapa abentsü asoshi Xi shimba sülen pa shimogo.

China nung zero-Covid policy benoka sorkar anema nüburtemi longkak aitba ajanga mepet mesü nung aliba lapoktsür tang Xi-i pa jenjang yanglushiogo. Kasa mapang nung linük nung birth rate tajemba akümba ajanga rongsenketzung terenlok nung tetsükdaksü adokba mapang ka lir.

Iba hopta National People's Congress aser Chinese People's Political Consultative Conference (CPPCC) session ya kanga kümdanga meita ataogo, kechiyong iba ajanga taruba kümtem tsügdä China koloni aotsü iba indang tangatetba ka agütsür.

Mao Zedong sülen China nunger lenirtem office nung term ana dak tali memeni arua liasü. Ajisüaka Xi-i iba tenokdangba ya 2018 küm aginogo aser iba ajanga pa kanga tashi ita kümdaksüogo.

## Indonesia nung Merapi volcano pokteta adok

**Jakarta, Metsüremi/March 11 (Agencies):** Indonesia kübok Mount Merapi Honibarnü pokteta adokogo aser iba ajanga anü dena nembangtsüsa mokozi adokba den lava yangzüka aluba ajanga ketdangsürtemi tenemtsüng nung tourism aser mining inyakyimtem sota atatsüsa aküm.

Nütsünyongsük aika aliba Java asetkong nung amenoka aliba Merapi tenem pokteta adokba mokozi aser lava tenemtsüng nung km 7 tashi yangzüka alua liasü.

Mokozi column ka anüngleni meter 100 shi pokteta tugu, ta National Disaster Management Agency otongdar Abdul Muhari-i ashi.

Anogo tepeyong mokozi adokba ajanga anü tesangwa

nokdang aser yimtsüng aika mitsü agi sünga liasü, ajisüaka nisung asüba osangbo kecha mali.

2020 küm ketdangsürtemi tekümdangtsü metetdaksüba sülen Merapi tenem nungi tang lava timba yangzüka aluogo, ta Yogyakarta's Volcanology and Geological Hazard Mitigation Center tekolakba Hanik Humaida-i ashi.

Laisa, Merapi tenemtsüng nung alirtem dang tenem nungi km 7 shi pilar alitsü aser lava yangzüka aluba ajanga timtem lendong bener arutsütsü ana nung aliba meita atatsü metetdaksüogo, ta ashi.

Metre 2,968 talang tenem ya Yogyakarta nungi kilometer 30 shi pilar lir.

Iba volcano adokba tenem

temeket km 10 telongtet nung nisung million 25 shi alir.

Indonesia nung active volcanoes 120 dak tema aliba rongnung Merapi ya ajak dang active-ba lir. Iba volcano ya 2010 küma pokteta adok aser iba lendong nung nisung 347 asüba den yimdklar 20,000 dak tema pei ki toktsür aotsüsa aküm.

Indonesia nung nütsünyongsük million 270 shi lir aser iba linük ya mapang shia volcano aser menoknok agi kongshir, kechiyong linük ya Pacific "Ring of Fire," nung amenoka lir.

Kasa mapang nung 2021 küm December ita Mount Semeru nung volcano pokteta adokba sülen nisung 48 asü aser nisung 36 sama liasü.

**COUNCIL OF ARCHITECTURE**  
(A Statutory Authority of Government of India under Architects Act, 1972)  
India Habitat Centre, Core 6A, 1st Floor, Lodhi Road, New Delhi-110003  
website: www.nata.in, www.coa.gov.in

### EXAMINATION NOTICE: NATA-2023

Subject:- Announcement of NATA-2023 for admission into 1st year of 5-year B.Arch. degree course at institutions in the country.

The Council of Architecture is pleased to announce that National Aptitude Test in Architecture (NATA) 2023 shall be conducted by the Council thrice in the year 2023. The dates for Three Tests of NATA 2023 shall be 22.04.2023, 28.05.2023 and 09.07.2023 respectively. The test shall be conducted in two sessions on each day of the Test.

The eligibility for admission to 1st year of 5-year B.Arch. Degree Course, as prescribed by the Council under Regulation 4 (1) of the Council of Architecture (Minimum Standards of Architectural Education) Regulations, 2020, for the academic session 2023-24 is as under:  
**"No candidate shall be admitted to architecture course unless he has passed an examination at the end of the 10+2 scheme of examination with at least 50 per cent. aggregate marks in Physics, Chemistry and Mathematics and also at least 50 per cent. marks in aggregate of the 10+2 level examination or passed 10+3 Diploma Examination with Mathematics as compulsory subject with at least 50 per cent. marks in aggregate"**

The NATA portal shall also be opened shortly to facilitate the students to register for NATA 2023. The NATA-2023 Brochure with details of registration & other important dates is being uploaded on the websites www.nata.in and www.coa.gov.in.

The candidates desirous to take admission into 1st year of 5-year B.Arch. degree course at approved architectural institutions in the country during 2023-2024 are advised to register themselves for NATA-2023.

New Delhi  
Dated : 12.03.2023

Registrar

## PSG-i Stade De France atema bid asütsü



Stade de France

**Metsüremi/March 11, 2023 (Agencies):** Paris St Germain-i linük nung stadium tulutiba Stade de France atema bid asütsü ta Ligue 1 champions yagi Hokolbarnü metetdaksü. Parnok tang asaya aliba Parc des Princes stadium toktsütsü atema inyaktepba mapang ka nung iba osang sangdongogo.

Paris mayor Anne Hidalgo-i Parc des Princes ya ayoktsüba atema masü ta ashiba sülen PSG-i January ita parnok home stadium atema tanga ka bushitsü ta shia liasü.

Stade de France nung 1998 küm World Cup final asaya aser 2000 küm nungi tang tashi nung Champions League final asem tashi asayaogo, kong taoba küm Real Madrid-i Liverpool akokba final asaya densema lir.

Iba stadium nung nisung 80,000 shi asemtsü.

PSG otongdari Reuters dang ashiba agi, iba capital club yagi Stade de France alizütsü atema bid asütsü, saka parnoki Parc

des Princes nungia tasayanüba lir. Parc des Princes ya Paris city council meyong lir aser 1974 küm top flight-i aitba sülen tang tashi PSG indang home ground lir.

2013 küm PSG aser Paris City Council ya 2043 küm tashi iba ground PSG-i amshitsü atema tenanzüktepba ka yanglushi aser iba sülen parnoki küm asem tsünga euro million 75 intoka iba stadium yanglushi.

Ligue 1 club yagi Parc des Princes' yanglushitsü atema ano euro million 500 intoktsü mulunga aliba sangdongogo, ajisüaka iba stadium ya parnok meyong aküm nungdang iba sen intoktsü, ta ashi.

French media sangdong balala ajanga ashiba agi, PSG-i November ita Parc des Princes alitsü atema asüngdang saka PSG tir Nasser Al-Khelaifi-i Marca den sensaksema mapang iba stadium nung club asayadaksütsü atema kanga

mulungsoabo mali ama reprangtetogo, ta ashi.

Stade de France ya 1998 küm lapok aser iba tesem nung World Cup final asaya. Iba stadium nungsa 2024 nung Summer Olympics nung track aser field asayatem asayatsü.

Taoba küm Liverpool pusemertem meyorejang aika Stade de France telungi mitetba sülen Champions League final asaya menor tenzük. Iba asaya Real-i goal 1-0 agi akok.

Kasa mapang nung otongdarisa PSG atema tasembuba lenmangji Paris adena orr stadium tasen ka yanglutsüsa akümtsü.

2011 küm Qatar Sports Investments-i alizükba sülen PSG ya France nung takok tajungtiba anguba club kümogo aser parnoki tang tashi nung league tiben koka lir. Parnokisa France domestic asayamungtem amokbanger asaya arudar ajisüaka tang tashi nung Champions League ken danga koka mali.

## Britain-i sponsors tem dang IOC nongshitsü mepeshi

**Metsüremi/March 11, 2023 (Agencies):** Taruba küm Paris Olympic nung Russia aser Belarus nung asayartem shilem agidaksütsü atema International Olympic Committee (IOC)-i benoker aliba dak sendakba nung British sorkari Olympic sponsors tem dang IOC nongshitsü atema mepeshia shiti ka züluogo, ta British media-i Honibarnü metetdaksü.

January ita Russia aser Belarus nung asayartem Asian qualifying ajanga Olympic slots agütsütsü aser neutral asayartem ama Paris nung asayadaksütsü atema lenmang ka mesapoka toktsüba sülen lokti tentet balalai IOC aija arudar.

Britain indang Culture Secretary Lucy Frazer-i, Coca-Cola, Samsung aser Visa densema Olympics' sponsor tulu 13 indang UK chief executive tem dangi sorkari tebilemba lemsatepa shiti zülua liasü.

"Russia aser Belarus nung saisapong aser yimden

yimsüsüba kanga junga sendaktepa lir ta meteta lir aser Russia aser Belarus nung tang yimsüsürtem nem saisapong ya parnok ajanzüktsü atema mamshidaksütsü onok mulungteter lir.

"Onoki süoki ia bilemba aser mapa küma inyaktettsüsa 'neutrality' model tejangja ka mebenok tashi onoki Russia aser Belarus nung asayartem nem temelaba agütsütsü memulunger."

Ukraine-ia Paris Games nung Russia aser Belarus nung asayartem shilem agidaksütsü Ukraine nung asayartem shilem magidaksütsü ta amokmerenogo.

British sorkari taoba ita linük 34 den külemi IOC dang Russia aser Belarus nung asayartem iba asayamung nung shilem magidaksütsü khang sangdong ka metetdaksütsü.

Russia-i Ukraine amak tenzükba sülen IOC-i Russia aser Belarus nung asayartem nem tenokdangba agütsü, ajisüaka Cold War mapang mepetmesü adokba ama

tanaben mataloktsü atema IOC-i asayartem Olympics nung masayatsü atema tenokdangba agütsütsü nongnanger.

Olympics nung neutral asayartem ya pei linük nungi shilem agiba ama mezüngshir aser parnoki takok anguba mapanga linük wako matsüketer aser linük naklo ken matemer.

Rara tenzükba sülen international sports federation tim timba kati iba linük ana nungi asayartem nem tenokdangba agütsü, ajisüaka parnok asayadaksütsü atema temelaba agütsü tenzükogo.

"IOC-i tatembangbuba telemtetba ka agia mali asünung onoki IOC-i iba ken o ya asadangshitsü aser linüktem tejangraba apir telemtetba agütsü mepeshir," ta Frazer-i zülutsü.

"Olympic partner ama iba ken o dak sendakba nung nenok tebilemba lemsateptsü pelashishia jaoker aser shisema aliba onük dak sendakba nung onok den longjemer IOC nongshitsü ayongzükter," ta shiti nungsa shia lir.

## Rohit Sharma-i international runs 17,000 yangluogo

**Metsüremi/March 11, 2023 (Agencies):** India aser Australia na tsünga Border-Gavaskar Trophy nung pezütsüba aser deciding Test asayaba mapang mezüngbuba innings nung run 35 yangluba sülen Rohit ya India nung batter temrongnungi iba alizüng tongtetba asayar trokbuba kümogo.

Narendra Modi Stadium, Ahmedabad nung Test tenzükter tanabuba anogo tembangba tashi nung Rohit-i out mesüi run 17 yanglur liasü aser tasembuba anogo run pezü yangluba sülen pai international cricket asaya nung run 17,000 yanglua liasü.

International cricket asaya nung run 17,000 dak tema yangluba India nung asayar Sachin Tendulkar, Virat Kohli, Rahul Dravid, Sourav Ganguly

as er Mahendra Singh Dhoni nung den Rohit-a densemogo.

Rohit 2017 küm June ita Ireland den asayaba mapang India tenüng nungi mezüngbuba international asaya nung shilem agia liasü aser pai tang tashi nung Test 48, One Day International 241, T20I asaya 148 nung asaya lir.

Pai Test asaya nung run 3348, ODI asaya nung run 9782 aser T20 asaya nung run 3853 yanglua lir.

Kasa mapang nung ODI cricket asaya nung Rohit kija-i double century asem tashi yanglua lir.

Ahmedabad nung iba test asaya kokra India team-i iba asayamung 3-1 agi akoktsü aser World Test Championship final nung Australia den asayatsü atema qualify asütsü.

## Dimapur nung 14buba Open Naga Wrestling asayamung asayatsü



Nagaland Wrestling Association ketdangpurtem-i osangbener den jempiha noksa angur.

**Dimapur, Metsüremi/March 11 (TYO):** 14buba Open Naga Wrestling aser 1buba Belt Wrestling Championship, Dimapur Government College anasa Multi Disciplinary Sports complex nung March 17-18 nü asayatsü. Iba asayamung ya Nagaland Wrestling Association-i ayongzuka asayatsü.

Honibarnü osangbenertem den sensaksema mapang NWA tir Dr. Hiabe Zeliang-i ashiba agi, anogo ana asayatsü aliba asayamung ya tang mezüngbuba Dimapur nung asayatsü aser Manipur nungi asayar pongu densema iba asayamung nung wrestler 100 shi-i shilem agütsü. Iba asayamung ya Zeliang Wrestling Association aser Kuda Village Council na longjemer host asütsü.

Hiabe-i, asayamung koba tang mezüngbuba state yimtiba nung pilar asayatsü lir, iba ajanga wrestling asaya nung shilem agütsü atema nüburtem ajungmesotsü ta amangba lemsatepba den iba asaya ajanga asayartem nem alima ajanga nung shilem agütsü atema maongka agütsür ta ashi.

Asayamung ajunga V-Tech den longjemer paid per view system nung live sayutsü.

Digital media kecha live stream asütsü memelatsü.

Open Naga Wrestling championship ya March 18 nü asayatsü, kong Chief Minister Neiphiu Rio alakteta jaoker asütsü aser Deputy Chief Minister TR Zeliang mejeta jaoker asütsü. March 17 nü Belt Wrestling meet nung Advocate Timikha Koza, president Tenyimi Public Organisation alakteta jaoker asütsü.

Iba asayamung atema participants' allowance densema senpet ajak senteper sen lakh 10.52 agütsütsü. Naga style wrestling akoker nem senpet sen lakh 2.10, 2nd- 1.60 lakhs, 3rd- 1.10 lakhs, 4th-80,000 aser quarterfinalists pezü nem sen 10,000 agütsütsü. Belt tetoktepba nung gold medal angur nem sen 10,000, Silver-7,000 aser Bronze medal angur nem senpet sen 5,000 agütsütsü.

Asayamung nung shilem agütsü atema tenüng züngoksemtü asoshi March 16 tashi anogo atsülangtsüogo aser form tem Sports World and Colour Studio Kohima, United Sports Agency (Dimapur), Ada Grocery (Jalukie), S Printers Enterprise (Phek), Life Centre Bakery (Pfutsero) aser CP Stationary (Pfutsero) nung angutsü.

## BILEMDANGANG

"Shisatsübo bushi nungang angutsü."